

իսկ գործունէութեան շրջանները՝ Նախիջե-
ւան, Գողթան եւն.:

Միւս կողմից՝ հայ Լուսաւորչական հոգե-
ւորականութեան միջից էլ նրանց դէմ սուր ե-
կան արժանաւոր արոյթաններ՝ Եսայի Նզեցի,
Յովհան Որոտնեցի, սրա աշակերտը՝ Գրիգոր
Տաթեւացի, եւն.: Յետագայում Միարար Դո-
մինիկեանների վրայ աւելացան Հայաստանում
քարոզիչներ նաեւ ուրիշ կարգերից — Օգոս-
տինեան, Կարմեիեան, Կապուչինեան, Յիսուս-
եան եւն.: Այսպիսով սկսուեց մեր երկրում մի
զօրեղ պայքար կոթողիկոսութեան եւ լուսաւոր-
չականութեան մէջ՝ յանուն հայ ժողովրդի հո-
գու փրկութեան:

Միսիոնարների ներկայութիւնը վերջ ի
վերջոյ մի շարիք էր մեր երկրում եւ դժբախ-
տութիւն հայ ժողովրդի համար, որովհետեւ
նրանք անվերջ խռովութիւնների ու պառակտ-
ման պատճառ դարձան, դրանով էլ աւելի թու-
լացնելով մեր առանց այն էլ թոյլ հաւաքակա-
նութիւնը: Բայց եւ չպիտի ուրանալ, որ նա
եղաւ նաեւ մի բարիք՝ Հայաստանի անկախու-
թեան գաղափարի տեսակէտից, որովհետեւ,
ինչպէս քիչ յետոյ կը տեսնենք՝ քարոզիչները
խոշոր դեր խաղացին այդ գաղափարի հրա-
հրման գործում:

Սկզբում, երբ նրանց յետին նպատակները
դեռ եւս բոլորովին քողագերծ չէին արուած,
հայ ժողովրդի վերաբերմունքը դէպի կաթոլիկ
քարոզիչները բաւական բարեկամական էր:
Դրա պատճառը ամենից առաջ այն է, որ ապ-
րելով մահմեդական ծովի մէջ եւ մահմեդա-
կան բռնակալութեան ներքոյ, հայերը բնա-
կանաբար սիրով պիտի ընդունէին «իրենց հա-
մար» արեւմուտքից եկած աչք քրիստոնեայ
եղբայրներին եւ ամէն կարգի աջակցութիւն
ցոյց տային նրանց:

Միւս կողմից՝ նրանք՝ կաթոլիկ քարո-
զիչները, կանգ չառնելով ոչ մի միջոցի առջեւ,
անգամ զրպարտութեան ու կաշառքի, կարո-
ղանում էին համակիրներ ու բարեկամներ շա-
հել, եւ հետեւաբար նաեւ ազդեցութիւն ձեռք
բերել: Դրա հետ միասին՝ նրանց գործունէու-
թեան մէջ կային որոշ գեղեցիկ բաներ, որոնք
չէին կարող համակրութիւն չզտնել ժողովրդի
կողմից. այսպէս, հիմնում էին դպրոց-
ներ, հրատարակում էին գրքեր, հնարում էին

զանազան խաղեր — օրինակ լոտօի նման —
կրօնական ուսուցման նպատակով, ճանապար-
հորդում էին կարաւանների հետ՝ նրանց օգնե-
լու եւ ճանապարհներին քարոզելու համար եւ-
այլն: Մասնաւորապէս նրանց հմտութիւնը ո-
րոշ զիտութիւնների մէջ, մանաւանդ բժշկու-
թեան եւ վիրաբուժութեան, ժողովրդին հաս-
ցրած ձրի բժշկական օգնութիւնը — սրանք
հանգամանքներ են, որոնք հայ ժողովրդին լաւ
էին տրամադրում դէպի կաթոլիկ քարոզիչնե-
րը:

Այդ ընդհանուր վերաբերմունքով պիտի
բացատրել այն, որ նոյնիսկ լուսաւորչական
հոգեւորականութիւնը այնքան բարեհաճ եւ
սիրալիք էր դէպի նրանց, որ թոյլատրում էր
լուսաւորչական եկեղեցիներում ժամերգու-
թիւն կատարել, քարոզ խօսել եւն.: Իսկ նրանք
այդ համակրութիւնը համարելով հակամիտու-
թիւն հայ ժողովրդի կողմից դէպի կաթոլիկու-
թիւնը կամ պատրաստակամութիւն կաթոլի-
կութիւն ընդունելու, իրենց գործողութիւննե-
րի մէջ դառնում էին աւելի վճռական, աւելի
յանդուգն: Շատ անգամ դիմում էին կառավա-
րութեան՝ նրա միջոցով բռնութեամբ հայ լու-
սաւորչականներին դաւանափոխ դարձնելու,
որով ուրեմն, հայ ժողովրդի տանջանքների
վրայ նոր տանջանքներ էին աւելացնում, նոր
հալածանքներ ստեղծում:

Պէտք է ասել, որ միսիոնարները հակա-
յական ազդեցութիւն եւ կշիռ ունէին մասնա-
ւանդ պարսկական կառավարութեան մօտ, հե-
տեւապէս, նրանք շատ բան կարող էին անել —
եւ անում էին — հայ ժողովրդի դրութեան
վատթարացման տեսակէտից:

Նրանց ազդեցութեան պատճառները, մա-
նաւանդ պարսից արքաների վրայ, մէկից ա-
ւելի էին. —

Ամենից առաջ՝ որ միսիոնարներից շատե-
րը սոսկական քարոզիչներ չէին միայն, այլ
դրա հետ միասին նաեւ այս կամ այն եւրոպա-
կան պետութեան ներկայացուցիչը Պարսկաս-
տանում: Շատերն էլ եթէ այդ յոյժ կարեւոր
պաշտօնական հանգամանքը չունէին, բայց
գոնէ ունէին յանձնարարական թղթեր այս կամ
այն պետութիւնից եւ վայելում էին նրանց հո-
վանաւորութիւնն ու պաշտպանութիւնը: